

FILIPINO

Kwarter 1: Supplemental 3 ANGKOP NA MGA PAHAYAG SA PAGBIBIGAY NG SARILING PANANAW



Paunang Salita

Bilang tugon sa makabagong tunguhin sa pagkatuto ay binuo ang serye ng modyul na ito. Nilalaman nito ang mga lubhang mahahalagang kasanayang pampagkatuto o Most Essential Learning Competencies (MELC) sa ilalim ng kasalukuyang kalagayan ng edukasyon. Upang matugunan ang hamong kinakaharap sa edukasyon, kalusugan at kaligtasan malaking tulong ang modyul na ito sa patuloy na pag-aaral ng kabataan sa loob at labas ng paaralan sa pakikipagtulungan ng mga magulang at tagagabay

Inaasahan na ang modyul na ito ay higit na makatutulong sa paglinang ng kasanayan at kakayahan ng mga mag-aaral.

ANGKOP NA MGA PAHAYAG SA PAGBIBIGAY NG SARILING PANANAW

Panimula:



Magandang araw! Kumusta na kaibigan?

Higit na magiging malinaw ang iyong pananaw sa isang paksa o isyu kung makikilala at magagamit mo ang mga ekspresiyon sa pagpapahayag ng pananaw. Mahalagang bahagi ng ating pang-araw-araw na pakikipagtalastasan ang pagpapahayag ng sariling pananaw o opinyon. Kailangang matutuhan mo kung gayon ang mabisang paraan ng pagsasagawa nito.

Tara, oras na upang magsalita at ipahayag ang nais sabihin. Pananaw mo, ihataw na!.


Sa supplemental na ito, inaasahan na inaasahan na nagagamit mo ang angkop na mga pahayag sa pagbibigay ng sariling pananaw



Layunin



May mga bagong salita na dapat mong kilalanin para sa araling ito. Magagamit mo ang mga ito upang ganap mong maunawaan ang mga susunod na talakayan tungkol sa ating paksa.



Suriin ang mga pangungusap na hango sa sanaysay:

- Sa kanila, **ang sabi ko**, ang katotohanan ay walang kahulugan kundi ang anino ng mga imahe.
- At mayroon bang bagay na nakapagtataka sa mga taong nakadaan mula sa banal na pagninilay-nilay patungo sa makasalanan nilang kalagayan o gumawa ng labag sa kagandahang-asal. **Samantala**, habang ang kaniyang mga mata ay kumukurap bago siya mahirati sa kadiliman, siya ay mapipilitang lumaban sa korte o sa ibang lugar, tungkol sa anino ng imahe ng katarungan at magpupunyaging maunawaan nang ganap ang katarungan

Sa unang pangungusap, naipahayag ng may-akda ang kaniyang pananaw batay sa kaniyang iniisip o sinabi. At sa ikalawang pangungusap ginamit ang ekspresiyong **samantala** na nagkaroon ng pagbabago sa unang bahagi sa ikalawang bahagi na ginamit ang ekspresyon.

MGA EKSPRESIYON SA PAGPAPAHAYAG NG PANANAW

May mga ekspresiyong ginagamit sa pagpapahayag ng pananaw at nagpapahiwatig ng pagbabago o pag-iba ng paksa at/o pananaw.

1. Mga ekspresiyong nagpapahayag ng pananaw. Kabilang dito ang ayon: ayon, batay, para, sang-ayon sa/kay, ganoon din sa paniniwala/pananaw/akala ko, ni/ng, at iba pa. Inihuhudyat ng mga ekspresiyong ito ang iniisip, sinasabi o pinaniniwalaan ng isang tao.

Halimbawa:

a. Ayon, Batay, Sang-ayon sa

- **Sang-ayon sa** Memorandum Order No. 20: Series of 2013 ng Commission On Higher Education na pinagtitibay ang pagkawala ng Filipino bilang isa sa mga asignatura sa ilalim ng General Education Curriculum o GEC sa taong 2016.
 - **Batay sa** Konstitusyon 1987: Artikulo XIV, Seksyon 6, ang wikang pambansa ng Pilipinas ay Filipino.
 - **Alinsunod sa** tadhana ng batas at sang-ayon sa nararapat na maaaring ipasya ng Kongreso, dapat magsagawa ng mga hakbangin ang pamahalaan upang ibunsod at puspusang itaguyod ang paggamit ng Filipino bilang midyum ng opisyal na komunikasyon bilang wika ng pagtuturo sa sistemang pang-edukasyon."
 - **Ayon sa** tauhang si Simoun sa El Filibusterismo, "Habang may sariling wikaang isang bayan, taglay niya ang kalayaan."
- ✓ Ginagamit ang mga ekspresiyong ito kung mayroong matibay na batayan ng pahayag, samakatuwid katotohanan ang isinasaad nito na maaaring magsaad ng ideya o pangyayaring napatunay at tanggap ng lahat ng tao.

b. Sa paniniwala, akala, pananaw, paningin, tingin, palagay ni/ng

- **Sa paniniwala ko** ang pagkakaroon ng isang mataas at matibay na edukasyon ay isang saligan upang mabago ang takbo ng isang lipunan tungo sa pagkakaroon ng isang masaganang ekonomiya.
 - **Sa aking pananaw** ang edukasyon ay kailangan ng ating kabataan sapagkat ito ang kanilang magiging sandata sa buhay sa kanilang kinabukasan.
 - **Sa tingin ng** maraming guro na ang pagkatuto ng mga mag-aaral ay hindi lamang nakasalalay sa kanila kundi maging sa mga magulang sa pagbibigay patnubay at suporta sa kanilang mga anak.
- ✓ Ginagamit ang mga ekspresiyong ito batay sa sariling paniniwala, ideya, saloobin at perspektibo. Samakatuwid opinyon ang isinasaad nito na hindi maaaring patunayan.

c. Inaakala, Pinaniniwalaan, Iniisip

- **Pinaniniwalaan** kong higit na dapat pagtuunan ng pamahalaan ang isyu tungkol sa lumalalang kalagayan ng ating kalikasan
- **Inaakala ng** iba na hindi mahigpit sa pagpapataw ng kaparusahanang DENR kaya patuloy silang lumalabag sa batas pangkalikasan.

d. Sa ganang akin, Sa tingin, akala, palagay ko

- **Sa ganang akin**, kailangan dagdagan pa ng mga pamahalaang lokal ang pagbabantay sa kabataang nasa lansangan tuwing hatinggabi dahil sa lumalalang krimen.
- **Palagay ko**, kailangan ang malawig na programa ng DSWD para sa mga batang lansangan na karaniwang sangkot sa maraming krimen sa kalsada.

2. May mga ekspresiyong nagpapahiwatig ng pagbabago o pag-iiba ng paksa at/o pananaw, tulad ng sumusunod na halimbawa na tumitiyak kung sino ang pinagmumulan ng pananaw, nagpapahiwatig lamang ng pangkalahatang pananaw ang sumusunod na halimbawa:

a. Sa isang banda, Sa kabilang dako


- **Sa isang banda**, mabuti na ngang nalalaman ng mamamayan ang mga anomalya sa kanilang pamahalaang lokal nang sa gayo'y masuri nila kung sino ang karapat-dapat na ihalal para mamuno sa kanilang lungsod.
- **Sa kabilang dako**, sa dami ng naglalabasang isyung pampolotika hindi tuloy malaman ng sambayanan kung ano ang kahihinatnan ng bansa sa kamay ng mga politikong pinagkatiwalang mamuno dito.

✓ Ginagamit natin ang mga ekspresyong ito kung magbabago ang tema at paksa ng pinag-uusapan sa isang pahayag.

b. Samantala, habang

- **Samantala** mamamayan mismo ang makapagpapasya kung paano nila nais makita ang kanilang bansa sa susunod na mga taon. Matalinong pagpapasya ang kailangan kung sino ang karapat-dapat pagkakatiwalaan ng kanilang boto.
- Maraming mga tao ang lugmok sa kahirapan **habang** ang iba ay nagpapakasasa sa kaban ng bayan.

✓ Mapapansin na ginagamit ang samantala sa mga kalagayang mayroong taning o pansamantala. Ginagamit naman ang habang kung ang isang kalagayan ay walang tiyak na hangganan o mahaba.



Sanggunian:

Peña, Estrella, et.al. (2016) Kanlungan 10 Ikalawang Edisyon (Batayan at Sanayang Aklat sa Pag-aaral ng Wika at Panitikang Filipino batay sa Bagong K- 12 Kurikulum). ELP CAMPUS JOPURNAL PRINTING: Resedencias Condominium Inc. Bldg.2 Unit 121, Jesus St., Pandacan Manila, Philippines, 36

Ambat, Vilma, et.al. (2015) Filipino-Ikasampung Baitang Modyul para sa Mag-aaral. Vibal Group Inc. Department of Education-Instructional Materials Council Secretariat (DepEd-IMCS): DepEd Complex, Meralco Avenue, Pasig City, Philippines